

Saham amanah tingkat ilmu pelaburan rakyat

TEKS penuh ucapan Perdana Menteri, Datuk Seri Abdullah Ahmad Badawi, pada majlis perasmian Minggu Saham Amanah Malaysia 2004, di Dewan Milenium, Kepala Batas, Pulau Pinang, semalam.

BERSYUKUR kita ke hadrat Allah kerana dengan limpah kurnia dan izinnya, dapat kita sama-sama berkumpul di Kepala Batas pada pagi ini. Saya ingin mengucapkan terima kasih kepada Permodalan Nasional Berhad (PNB) kerana sudi menjemput saya untuk merasmikan Minggu Saham Amanah Malaysia 2004 ini.

Syabas juga diucapkan kepada pihak pengurusan PNB kerana berjaya menganjurkan Minggu Saham Amanah Malaysia buat kali kelima. Usaha berterusan ini, dalam meningkatkan pengetahuan mengenai pelaburan, khususnya pelaburan dalam bentuk saham amanah, perlu dicontohi.

Pendekatan secara langsung dengan melaksanakan program pendidikan seperti ini, yang turut membabitkan penyertaan masyarakat umum melalui aktiviti dilaksanakan, mampu menarik minat orang ramai untuk sama-sama menjayakan minggu ini.

Saya berharap supaya sepanjang seminggu acara ini dilaksanakan di Dewan Milenium ini, segenap lapisan masyarakat akan memanfaatkan platform pendidikan yang dilaksanakan oleh PNB ini.

Kita seharusnya bersyukur bahawa senario ekonomi negara telah memperlihatkan peningkatan yang semakin positif. Sesungguhnya kesabaran, usaha gigih, kerjasama dan pengorbanan setiap rakyat dalam menghadapi pelbagai cabaran telah mula membuah hasil.

Bagi 2003, ekonomi Malaysia telah berkembang sebanyak 5.2 peratus, iaitu menjangkau anggaran awal sebanyak 4.5 peratus. Perkembangan ini didorong oleh perkembangan yang menggalakkan dalam semua sektor ekonomi, diterajui sektor pembuatan yang meningkat sebanyak 8.2 peratus.

Sektor pertanian juga berkembang dengan pesat sebanyak 5.5 peratus berikutan peningkatan jumlah pengeluaran serta kenaikan harga komoditi utama seperti getah dan kelapa sawit. Sektor perkhidmatan yang terjejas pada separuh tahun pertama 2003 - kesan dari wabak SARS - telah mengatasi pemulihan dengan mencatatkan perkembangan sebanyak 4.1 peratus secara keseluruhannya.

Perkembangan ekonomi negara pada 2003 didorong oleh peningkatan permintaan dalam negara berikutan

peningkatan pendapatan isi rumah dan sektor korporat. Di samping itu, peningkatan harga komoditi telah meningkatkan pendapatan penduduk luar bandar.

Secara keseluruhannya, perkembangan ekonomi negara adalah sejajar dengan perkembangan ekonomi serantau yang diterajui China yang mencatatkan perkembangan sebanyak 9.1 peratus dan Thailand yang mencatatkan perkembangan 6.7 peratus.

Selain itu, prestasi ekonomi juga telah mencatatkan pencapaian yang lebih baik berbanding ekonomi negara serantau lain seperti Singapura, Korea Selatan, Indonesia dan Filipina yang mencatatkan perkembangan kurang daripada lima peratus.

Pada 2003 juga, pasaran saham telah mencatatkan peningkatan baik, didorong oleh ekonomi negara yang mantap. Indeks komposit MSEB meningkat hampir 23 peratus, iaitu pencapaian tertinggi sejak 1999, dengan jumlah nilai dagangan harian yang menggalakkan.

Turut merencanakan lagi semua ini ialah peningkatan pembabitan pelabur tempatan berikutan penyeragaman lot dagangan kepada 100 unit.

Pada suku tahun pertama 2004 pula, prestasi pasaran saham terus menunjukkan peningkatan 13 peratus, jumlah tertinggi berbanding pasaran serantau dan juga pasaran utama dunia.

Prestasi yang menggalakkan ini didorong oleh peningkatan pendapatan sektor korporat, di samping peningkatan keyakinan pelabur ekoran kestabilan ekonomi dan suasana politik negara.

Sementara itu, aktiviti sektor swasta dijangka terus meningkat bagi menajana pertumbuhan ekonomi pada 2004. Seperti yang saudara-saudari sedia maklum, ekonomi negara dijangka terus meningkat dengan anggaran pertumbuhan di antara enam peratus hingga 6.5 peratus pada 2004.

Pada masa sama, kerajaan akan terus berusaha untuk meningkatkan daya saing ekonomi negara dengan menerokai sumber pendapatan dan kekayaan baru, mengurangkan kerenah birokrasi sektor awam dan memupuk budaya prestasi di kalangan sektor korporat.

Antara isu lain yang akan terus mendapat perhatian kerajaan termasuklah mempertingkatkan pembangunan sumber manusia melalui program pendidikan yang berdaya maju, membangunkan Islam Hadhari yang toleran dan progresif, membanteras gejala rasuah dan mengawal jenayah serta keselamatan awam.

Untuk jangka masa sederhana, kera-

jaan juga akan merangsang suasana perniagaan yang mengutamakan inovasi produk dan perkhidmatan tempatan yang mesra pelanggan. Ini amatlah penting kerana Malaysia sentiasa bersaing dengan negara serantau untuk menarik minat pelabur asing dan domestik.

Insyallah, segala kejayaan yang bakal dikecapi melalui usaha ini boleh mendorong pembangunan ekonomi negara dan secara langsung mempengaruhi prestasi pasaran modal. Saya percaya bahawa kejayaan dalam menangani kesemua isu-isu ini akan meningkatkan lagi kualiti rakyat serta menjamin perpaduan negara yang erat pada masa depan.

Pelaburan dalam unit amanah adalah alternatif yang bijak bagi masyarakat pelbagai lapisan yang ingin mula bergiat dalam pasaran modal dan memanfaatkan prestasi positif pasaran saham dengan cara yang lebih mudah dan terkawal.

Menerusi unit amanah, pelabur berpeluang meminimumkan risiko pelaburan kerana portfolio pelaburan sesuatu skim unit amanah terdiri daripada instrumen pelaburan yang pelbagai. Pada hakikatnya, kejatuhan harga

Pelaburan dalam unit amanah adalah alternatif yang bijak bagi masyarakat pelbagai lapisan yang ingin mula bergiat dalam pasaran modal dan memanfaatkan prestasi positif pasaran saham dengan cara yang lebih mudah dan terkawal.

sesuatu pelaburan dapat diimbangi atau ditampung oleh kenaikan harga pelaburan yang lain.

Ini berbeza jika dibandingkan dengan pembabitan secara langsung dalam pasaran saham, di mana nilai dan pulangan bergantung sepenuhnya kepada kenaikan atau penurunan harga saham itu.

Dalam erti kata lain, apabila saham meningkat, secara langsung pelabur akan untung dan jika nilai saham menurun, pelabur akan mengalami kerugian. Dengan yang demikian, kita harus sedar bahawa pelaburan secara langsung dalam pasaran saham memerlukan penelitian dan pemantauan yang rapi oleh pelabur sendiri. Kesilapan perkiraan atau fakta pastinya akan merugikan pelabur.

Dengan unit amanah pula, pelabur tidak perlu merasa terlalu gusar kerana tabung unit amanah diuruskan oleh pengurusan yang profesional dan ber-



ABDULLAH melawat pameran selepas melancarkan Minggu Saham Amanah Malaysia diiringi Ketua Menteri Pulau Pinang, Tan Sri Koh Tsu Koon (kanan) dan Ketua Eksekutif PNB, Datuk Hamad Kama Piah di Kepala Batas, semalam. - Gambar oleh Asman Ibrahim

kemahiran. Ini menjadikan unit amanah kaedah pelaburan yang sesuai untuk masyarakat umum yang kurang kepakaran dan masa untuk melabur terus di pasaran saham terbuka.

Pengurusan unit amanah diberi mandat dan amanah untuk memantau perkembangan pelaburan semasa supaya portfolio pelaburan yang sesuai dapat dipilih demi menjaga kepentingan pelaburnya.

Unit amanah adalah satu daripada instrumen pelaburan yang ada di pasaran dan tidak boleh disamakan dengan akaun simpanan di bank. Unit amanah turut terdedah kepada risiko turun naik

pasaran sebagaimana pelaburan secara langsung dalam pasaran saham, bon, sekuriti dan sebagainya.

Perbezaannya hanyalah bahawa tahap risiko unit amanah lebih rendah berbanding pelaburan secara langsung dalam pasaran. Dengan itu, prestasi unit amanah berkait rapat dengan prestasi pasaran saham yang kadangkala dipengaruhi sentimen pasaran dan senario ekonomi semasa.

Oleh itu, pelabur unit amanah harus peka terhadap hubungan kait antara risiko-pulangan pasaran yang mempengaruhi prestasi pelaburan yang dibuat dan tidak menganggap bahawa unit amanah membawa kadar pulangan yang tetap. Pemahaman mengenai perkara ini, walaupun dilihat agak rumit, amat penting dalam membuat pelaburan unit amanah yang bijak dan bertepatan.

Sekarang ini, rakyat mempunyai pilihan untuk melabur dalam 243 tabung

unit amanah, termasuk 10 tabung unit amanah yang diuruskan oleh PNB. Dengan jumlah itu, rakyat mempunyai pelbagai pilihan pelaburan dan bebas melabur dalam mana-mana unit amanah yang selari dengan matlamat pelaburan dan kemampuan risiko yang ditanggung mereka.

Tambahan pula, saya yakin bahawa pembabitan dalam unit amanah secara tidak langsung menambah pengetahuan dan pemahaman masyarakat mengenai elemen pelaburan.

Kewujudan tabung unit amanah juga memberi peluang kepada seluruh masyarakat untuk turut menikmati kemakmuran ekonomi negara. Sejarah dengan peningkatan prestasi Bursa Saham MASEB, nilai aset bersih unit amanah telah meningkat lebih kurang 31 peratus pada 2003 dengan nilai aset bersih kini berjumlah lebih RM72 bilion.

Bilangan akaun unit amanah pula telah melepasi paras 10 juta, dengan unit dalam pusingan berjumlah hampir 100 bilion. Ini adalah satu pencapaian yang amat menggalakkan. Saya berharap prestasi ini akan terus meningkat dan berkembang di masa akan datang.

Dalam pada itu, saya berharap syarikat pengurusan akan terus mempertingkatkan keupayaan mereka untuk mengurus tabung-tabung unit dan memberikan perkhidmatan yang terbaik kepada pelanggan mereka.

Di samping itu, pengurus unit amanah haruslah sehati-hati bersikap amanah, jujur dan ikhlas dalam mengurus pelaburan bagi pihak pelabur. Saya ingin menegaskan bahawa pihak berkuasa tidak akan teragak-agak untuk mengambil tindakan tegas terhadap sebarang penyelewengan yang membabitkan wang rakyat.

Sekiranya tabung-tabung unit amanah diurus dengan cekap dan baik, saya yakin unit amanah akan terus mampu menjadi instrumen pelaburan bagi mereka yang berpendapatan rendah dan sederhana untuk turut serta dalam arus pembangunan perdana negara.

Peluang untuk golongan seperti ini harus diperluaskan supaya lebih ramai orang akan mendapat manfaat daripada pelaburan unit amanah. Justeru, saya berharap lebih banyak syarikat pengurusan unit amanah akan menawarkan produk dan skim unit amanah yang sesuai bagi golongan seperti ini, supaya mereka tidak sekali-kali merasakan diri mereka terkecuali daripada peluang pelaburan ini.

Saya berbangga dengan sokongan yang ditunjukkan oleh badan dan syarikat berkaitan dalam memacu perkembangan industri ini. Saya percaya, usaha pendidikan pelaburan PNB selama ini sedikit sebanyak memberi panduan kepada masyarakat untuk bergiat dalam pelaburan.

Inisiatif PNB melaksanakan Minggu Saham Amanah Malaysia setiap tahun sememangnya memberi kesan kepada penerimaan dan kefahaman masyarakat terhadap industri pelaburan, khususnya unit amanah, terutamanya mengenai kefahaman berkaitan risiko dan pulangan dalam sesuatu pelaburan.

Saya difahamkan Minggu Saham Amanah Malaysia kali ini turut memberi penekanan terhadap perkembangan industri perancangan kewangan seperti juga tahun lalu. Dengan maklumat yang disampaikan, saya turut berharap supaya unit amanah mampu ditonjolkan sebagai mekanisme perancangan, kewangan diri dan keluarga untuk pelaburan di masa depan.

Justeru, saya menyeru supaya seluruh masyarakat, terutamanya rakyat Pulau Pinang, mengambil peluang ini untuk mengunjungi Minggu Saham Amanah Malaysia dan menimba sebanyak mungkin pengetahuan berkaitan pelaburan sambil menyertai pelbagai aktiviti yang telah dirangka ke arah merealisasikan aspirasi masyarakat celik pelaburan, berilmu dan berwawasan.

Saya berdoa supaya setiap apa yang diusahakan ini mendapat keredhaan Allah dan beroleh kejayaan serta mencapai matlamatnya.